

13 JUN 1998

LAWATAN PROMOSI PAHANG BERTUJUAN DAPATKAN PELABURAN MODAL

KUANTAN, 13 Jun (Bernama) -- Kerajaan negeri Pahang akan meneruskan lawatan-lawatan promosi khusus bagi mendapatkan pelaburan berintensifkan modal seperti yang dilakukan selama ini, kata Menteri Besar Tan Sri Khalil Yaakob hari ini.

Semasa berucap pada majlis perasmian Kilang Pahang Cement Sdn Bhd di sini, beliau berkata usaha-usaha promosi itu dibuat bagi memastikan pelaburan ke negeri ini terus meningkat.

Majlis perasmian kilang berharga RM700 juta itu dilakukan oleh Perdana Menteri Datuk Seri Dr Mahathir Mohamad. Kilang itu, yang terletak di Bukit Sagu, kira-kira 50km dari sini, merupakan usahasama antara Kerajaan negeri Pahang dan YTL Cement Bhd.

Khalil berkata kerajaan negeri berbesar hati dengan perhatian kerajaan pusat untuk memajukan Koridor Industri Pantai Timur dengan pengkhususan kepada industri kimia dan petrokimia.

Sektor perindustrian di negeri-negeri Pantai Timur tidak lagi dianggap ketinggalan, malahan pelaburan tempatan dan asing sebenarnya kian meningkat.

"Sumbangannya kepada aktiviti ekonomi setempat terserlah dengan menyediakan pekerja terlatih dan perolehan hasil negeri serta kerajaan tempatan," katanya.

Mengenai kilang Pahang Cement, Khalil berkata ia akan membekal simen untuk Koridor Industri Pantai Timur dan berperanan sebagai unsur penggerak ekonomi tempatan.

-- BERNAMA
ROS NAK